

春三月 公臣蠟崎廣年亦有奉 公命入京
在其旅舍作其來服酋長有功者十二人圖像
其畫精緻異常愿因往觀焉是以亦與廣年相
識及 令廣英請記愿因叩二人以其作砲之
所由度其不致事實之乖謬焉要之大砲之用
凡三一以靖國一以平亂一以威遠且夫砲未
嘗一發其機而有是三大偉功者雖其麾下之
士固與有其力而 公之於智武亦大卓烈矣
哉

詩 前日所已獻今更附錄

雄藩耀武鎮東圻巨砲如山世所希造物佐時
開秘巧神人驅石發玄機海翻深壑千鯨走煙
漲遙空萬霆飛皮服從來皆懾伏大荒更見震
邦威

寬政三年辛亥秋八月五日

平安皆川愿謹撰并書

